

Baluart di Mahuma Sra. Evarista Kelly, un hende muhe balente

ACCION di Bario ta di bishita e siman aki den e bisindario di Mahuma y como baluarte di e bario a scoge e biaha aki un hende muhe pa conmemora cu apenas siman pasa tabata Dia Internacional di Hende Muhe. Pa Prome Minister Mike Eman ta un placer di por rindi respet, honor y reconocimiento na un digno hende muhe Arubiano cu henter su bida a traha duro y a lanta su famia cu e miho balor y moral cu e por a duna nan.

Sra. Evarista Kelly ta biba den e mesun cas na Mahuma 36 caminda el a celebra su matrimonio na e edad hoben di 17 aña, e tempo aya considera algo masha normal. E ta conta cu el a yega e bario di Mahuma cinco aña prome na 1951 y na 1956 el a contrae matrimonio cu Antonio Kelly. For di e union aki cu a dura henter nan bida, a nace cinco yiu di cual dos a muri tempo nan tabata baby. Awendia Evarista ta e feliz wela di cuater nieto ya grandi.

Apesar cu su casa tabata traha den Lago y despues na Douane, Evarista y Antonio a sa di probecha di e bondad di tera. Mescos cu el a haci como mucha hunto cu su mayornan y rumannan, Sra. Evarista a planta hunto cu su famia. E cu Antonio tabata planta entre otro maishi, boonchi, pinda, batata dushi, pampuna, patia, boonchi conofes, boonchi duro, boonchi largo y

haya hopi pasobra e cunucu ey na Mahuma tabata hopi fertil.

“Nos tabata planta pa cas, pa nos mes come, no pa bende. Ora cu tabatin pinda y boonchi di mas, e ora ey tabata bay Playa cu mi ruman pa bende,” Sra. Evarista a conta. “Cuminda di cunucu mes tabata yena bo bariga.” El a sigui splica cu planta pa bo mes come tabata un trabou dificil. Por ehempel, traha un pan di maishi rabo tabata rekeri henter un proceso, pero na mesun momento tabata resulta den algo dushi, saludabel y cu hopi satisfaccion.

Sra. Evarista ta conta cu e cumindanan cu tabata come mas tanto den cas tabata concomber, boonchi, ademas di cabrito y carne pa esunnan cu tabata cria bestia. Otronan cu tabata subi lama, tabata biba di pisca pa come hunto cu funchi. Sin duda algun tabata un estilo di bida mas facil, tranquil y economico. Pesey mes, e ta haya hopi bon cu awendia Gobierno di Aruba ta poniendo hopi enfoke riba agricultura. Departamento di Santa Rosa, entre otro, ta duna les na e hobennan con pa planta. “Awendia bo no ta haya un yiu pa ranca un mata, corda pa planta. Nos tabata mucha muhe, pero nos no tabata worry, nos tabata traha duro,” Sra. Evarista ta comenta.

Ya un hende grandi, Sra. Evarista ta wak atras riba un bida

yen di obstaculo, pero tambe yen di satisfaccion personal. Dependiendo semper di e trabou duro di su mannan, nunca su yiunan a falta cuminda riba mesa, pero tampoco un bon consejo. Esey ta algo cu Sra. Evarista lo kier sigui mira paso segun su opinion, e papel di mayornan den e formacion di un hende ta sumamente importante. “Educacion semper ta bin na prome luga. Mi kier mira pa e mama y tatanan papia hopi cu nan yiunan,” el a bisa. “Nan ta lanta sin sa kico ta bon y kico ta malo. Ta bon pa e mamanan pone bon tino, papia hopi cu nan.” Por ultimo, Sra. Evarista a comparti e pensamento cu “educacion tin cu sali di cas.”

Pa ekipo di BoBario y en particular pa Prome Minister Mike Eman ta un placer di tin e oportunidad di no solamente bishita, pero tambe expresa su palabra di reconocimiento na un Señora ehemplar. Sra. Kelly sin duda ta un ciudadano ehemplar di e bario di Mahuma y un digno yiu di tera.

